

VENDIM
Nr. 1001, datë 2.12.2015

PËR INTEGRIMIN E SPITALIT UNIVERSITAR TË TRAUMËS DHE SPITALIT
USHTARAK TË FORCAVE TË ARMATOSURA NË NJË STRUKTURË TË BASHKUAR

(ndryshuar me VKM-në nr. 460, datë 26.7.2023)

(i përditësuar)

Në mbështetje të nenit 100 të Kushtetutës, të ligjit nr. 10296, datë 8.7.2010, “Për menaxhimin financiar dhe kontrollin”, të ligjit nr. 55/2022, “Për shërbimin spitalor në Republikën e Shqipërisë”, të ligjit nr. 147/2014, “Për shërbimin e urgjencës mjekësore”, të ligjit nr. 64/2014, “Për pushtetet dhe autoritetet e drejtimit e të komandimit të Forcave të Armatosura të Republikës së Shqipërisë”, të ligjit nr. 80/2015, “Për arsimin e lartë dhe kërkimin shkencor në institucionet e arsimit të lartë në Republikën e Shqipërisë”, me propozimin e ministrit përgjegjës për shëndetësinë dhe të ministrit të Mbrojtjes, Këshilli i Ministrave

VENDOSI:

1. Spitali Ushtarak i Forcave të Armatosura transformohet në Njësinë e Mjekësisë Ushtarake (NJMU), pranë Spitalit Universitar të Traumës Tiranë (SUT).

2. Spitali Universitar i Traumës dhe Njësia e Mjekësisë Ushtarake integrohen në kuadër të një strukture të bashkuar spitalore, me emërtimin Spitali Universitar i Traumës.

3. Spitali Universitar i Traumës është person juridik, publik, buxhetor, në varësi administrative të ministrisë përgjegjëse për shëndetësinë. Spitali Universitar i Traumës është pjesë e rrjetit të integruar të shërbimit mësimor e kërkimor-shkencor dhe spitalor në Republikën e Shqipërisë dhe ndjek e zbaton aktet ligjore e nënligjore në fushën e shëndetësisë.

4. Spitali Universitar i Traumës shërben si Qendër Kombëtare e Traumës me funksion mjekësor, mësimor e kërkimor-shkencor dhe ka këto përgjegjësi kryesore:

- a) Ofrimin e shërbimit të urgjencës mjekësore në nivelin më të lartë të saj në rang kombëtar;
- b) Përkujdesjen shëndetësore për personelin e Forcave të Armatosura që ka statusin e ushtarakut;
- c) Dhënien e kontributit me kapacitete shëndetësore në përgjigje të detyrimeve të Shqipërisë, si vend anëtar në NATO.
- ç) Ofrimin e veprimtarisë akademike, mësimore e kërkimore-shkencore në funksion të realizimit të procesit mësimor dhe kërkimor në fushën e shëndetësisë.

5. Struktura organike e integruar e Spitalit Universitar të Traumës hartohet dhe miratohet nga ministri përgjegjës për shëndetësinë dhe ministri i Mbrojtjes, sipas përgjegjësiave specifike.

6. Në strukturën organike të integruar të Spitalit Universitar të Traumës parashikohen funksione për personel civil dhe për personel ushtarak. Personeli civil është nën përgjegjësinë e planifikimit dhe të menaxhimit të ministrit përgjegjës për shëndetësinë. Personeli ushtarak është nën përgjegjësinë e planifikimit dhe të menaxhimit të Ministrisë së Mbrojtjes.

7. Drejtori dhe nëndrejtori civil i Spitalit Universitar të Traumës emërohen nga ministri përgjegjës për shëndetësinë.

8. Shefi i Njesisë së Mjekësisë Ushtarake është njëkohësisht edhe nëndrejtor ushtarak i Spitalit Universitar të Traumës. Nëndrejtori ushtarak i Spitalit Universitar të Traumës emërohet nga ministri përgjegjës për shëndetësinë.

9. Personeli tjetër mjekësor dhe administrativ i Spitalit Universitar të Traumës emërohet sipas kuadrit ligjor dhe nënligjor në fuqi.

10. Planifikimi buxhetor për funksionimin normal të Spitalit Universitar të Traumës kryhet nga ministria përgjegjëse për shëndetësinë dhe Ministria e Mbrojtjes, sipas përgjegjësiave përkatëse.

11. Ministria e Mbrojtjes bën planifikimin buxhetor të NJMU-së, ku parashikohen shpenzimet për personelin ushtarak të Spitalit Universitar të Traumës e për përkujdesjen shëndetësore ndaj personelit me statusin e ushtarakut, si dhe përballimi i shpenzimeve në kuadër të detyrimeve të vendit në NATO.

12. Ministria e Mbrojtjes vë në dispozicion fondin e akorduar për Spitalin Universitar të Traumës, në bazë të rregullave specifike të miratuara me udhëzim të përbashkët të ministrit të Financave dhe *ministrit përgjegjës për shëndetësinë*.

13. *Ministria përgjegjëse për shëndetësinë* është përgjegjëse për drejtimin, menaxhimin dhe administrimin e përgjithshëm të Spitalit Universitar të Traumës në të gjitha aspektet.

14. Ministria e Mbrojtjes ka të drejtë të thërrasë në çdo kohë personelin ushtarak të Spitalit Universitar të Traumës në interes të stërvitjeve me rëndësi të veçantë, të përballimit të emergjencave civile dhe të angazhimit në operacione ushtarake brenda dhe jashtë vendit. Personeli ushtarak i thirrur në detyrë nga Ministria e Mbrojtjes vijon të përfitojë të gjithë trajtimin ekonomik e financiar edhe gjatë periudhës së detyrës ushtarake.

15. *Ngarkohen ministria përgjegjëse për shëndetësinë dhe Ministria e Mbrojtjes për ndjekjen dhe zbatimin e këtij vendimi.*

Ky vendim botohet në Fletoren Zyrtare dhe hyn në fuqi më 1 janar 2016.

KRYEMINISTRI
Edi Rama